





邊奏存藁序

或有讀予邊奏存藁者曰存藁何謂也曰邊有令朝氛夕燐皆賊之形其名曰烟火賊之人馬見其名曰聲息烟火聲息皆有奏雖方略各具其說然所奏多或無日無之若常事然故削而不載亦多不勝載也蓋邊事之入奏固多

烟火聲息最多

則來降夷人走回人口以及進貢燒荒查勘功次叅問軍職措置糧料脩築整堡取撥官軍買領馬匹成造軍械關給衣布花袴鞵毛襖等事凡三百餘奏

其所存者是編是已曰是則然矣吾于子



願有質焉夫兵曹子之上官內侍今之貴臣老佛  
之徒世所崇尚督府某督府某兄弟勳貴勢豪又  
子同事也而子以疏遠偏方米鹽戎馬之間或斥  
其過惡或抹其所溺或一再言不足至再三言之  
中間言會兵及再言虜使事又上于九重言亦危  
矣子誠不憚煩獨不畏禍耶紙筆口語之間其不  
利于子隱而爲不測之深淵明而爲不可犯之雷  
霆者亦屢屢固于子無關得喪知愛子者能不爲  
子股慄以懼子亦知之否耶子而知之寧不亦有  
悔怨耶是編也不知子者猶將視之爲怪物爲贅  
疣以予觀之并削之可耳願毋以存藁爲也曰吾  
過矣吾過矣吾子之言良是然謂之愛我則可謂  
知我罪我其存藁乎吾將存吾藁以識吾過或者  
退遂第其卷冊而序之

天順元年五月十一日叅政葉盛謹書



葉文莊公邊奏存稿

卷一

赴任謝恩疏

詳陳軍務疏

禁革姦弊疏

保任撫臣疏

條議邊務疏

禁息流言疏

請重衝邊大將名爵疏

請還邊軍疏



請止楊俊督兵疏

請究冒糧官旗疏

酌脩邊儲疏

陳請乞恩疏

請給謝恩疏

給勅謝恩疏

給勅謝恩啓

卷二

請給關防疏

請發留京邊軍疏

再請發邊軍疏

請免邊將會哨疏

推舉邊將疏

禁左道疲軍疏

請補收糧官員疏

請補守備官員疏

免調官軍疏

計處料豆疏

卷三

議處虜警疏



給勅謝恩疏

撫服殘寇事宜疏

朶顏進貢疏

撫服事竣疏

議留孫安疏

欽賞謝恩疏

會議貢道疏

卷四

節省邊儲疏

陳言邊務疏

劾內官弓勝疏

急缺邊備疏

緊要邊備疏

請給協守勅命疏

急補邊將疏

卷五

災傷疏

請給醫藥疏

請給新軍花布疏

請復邊城廟學疏



推舉邊將疏

給醫謝恩疏

保舉邊將疏

保舉守備官員疏

請補協守邊將疏

劾弓勝孫安疏

請給獨石將軍勅諭事

陳言聖學疏

卷六

請定議事考滿日期疏

奏捷疏

勘詳內臣黃整等疏

走回人口疏

來降夷人疏

勦殺達賊疏

給繇疏

聲息疏

收獲馬匹疏

欽賞謝恩疏

卷七



飛報烟火疏

傳報聲息疏

衝邊缺官疏

災異疏

應恤宥官員疏

計處邊儲疏

急推邊將疏

陳言聖德疏

褒恤撫臣疏

給假乞恩疏

守制辭任疏

邊奏存稿目錄

邊奏存稿目錄

葉文莊公邊奏存彙卷一

吏部左侍郎謚文莊崑山葉盛存彙

孫衡州府同知 夢淇較定

六世孫禮部主事 重華彙梓

欽差協贊軍務山西布政司右叅政臣葉盛謹

奏爲邊務等事景泰三年十一月初九日節該欽  
奉

勅諭獨石馬營至長安嶺一帶係口外緊要地方操  
兵禦敵尤貴得人今朕以爾公正有爲特命往彼  
協贊都督孫安整飭軍務欽此欽遵伏念臣猥以



孤蹤久糜厚祿藩方參佐未能少効馳驅邊聞  
事機詎意上承 綸綍誠切感恩思報誓當勉  
力據忠臣無任瞻仰屏營之至除望 闕謝恩  
及馳赴獨石馬營等處管事外謹具奏稱謝以  
聞

景泰三年十一月初九日

題爲軍務等事節該欽奉

勅諭獨石馬營至張嶺一帶係口外緊要地方操兵  
禦敵尤貴得人今朕以爾公正有爲特命往彼協  
贊都督孫安整飭軍務凡彼修築城堡操練人馬

戰守長策悉聽爾與孫安等公同計議從宜處置  
事有當奏請者奏來定奪欽此欽遵臣惟獨石馬  
營等處

祖宗以來至爲緊要地方孤懸口外控制北狄第一  
虜衝也比年城戍匪人捐棄失守遂使朝廷有  
大不忍言之事幸賴

皇上中興撫運至明剛斷用人修復卽今已有成績  
事漸就緒然今日之事勢正如垂死得瘳之人  
養之以糜粥衛之以參苓猶恐病加小愈况不  
以良藥投之乎又如破器復完使加意捧持尚



有瑕璽况更欲傷損之乎臣本凡劣過蒙委任  
遵承 勅旨職在當言今將事宜開坐奏請乞  
勅該衙門詳議可否施行窮邊幸甚謹 題

一 邊方軍中奸弊如尅減冒支糧料占役辦納

錢科斂害軍徃年失人心疲人力壞邊事

者皆錄于此除欽遵 勅諭內事理嚴切關

防痛加禁約外但宣府口外係是極邊衛分

管軍頭目有犯前罪例該降調充軍守墩哨

瞭者或仍于本衛所或止是酌決着役以此

小人更無遷徙之苦無所忌憚合無今後除

軍人外管軍頭目有犯前罪如宣府口外者  
發遼東甘肅大同左右等衛所其遼東等處  
有犯者悉發開平衛庶使小人知畏法而重  
犯法奸弊可以銷除

一 獨石馬營等處曩自失守以來田土荒蕪狐  
兔之跡交道至今聞者尚有畏心况彼戍守  
之輩多係貧困逃移趨食卽今雖漸修復又  
值天年無收官軍人等雖是懼法前來戍守  
而妻男弟姪尚多寄住他處然中間貧難困  
苦者固多而懷奸觀望者亦有若不立法整



邊奏存彙 卷一  
理終是人力不敷極邊地方事非細故合無  
行令各城堡守備都指揮督同親管衛所官  
旗各將所管官軍從實審勘戶下舍人餘丁  
老幼家人等項不拘見在未到盡數供報姓  
名年甲在官如隱匿不報者治以重罪備細  
甘結造冊通送提督協贊官處以憑親詣各  
屬招撫未到者拘取前來見在者加意存恤  
使其盡力耕種以期來歲收成應襲官舍并  
餘丁如有情願下場操練者量與月支口糧  
三斗養贍不願者聽其隨住生理幫貼軍裝  
庶使下情願戀緩急有人

一 邊城攻守之策錢糧最爲急務正統十四年  
獨石馬營等處拋棄糧料九十九萬有零以  
今較之十尚未及三四蓋緣往時儲蓄年久  
屯戍豐收自經拋棄以來雖是多方措置終  
然轉運艱難除行各屬將殘毀缺少倉廩等  
項設法脩葺外合無將累次報中鹽糧客商  
該部通查拘送提督都御史處審勘中間有  
力無力聽其轉換與人不許賣窩私賄但係  
有米之人准與更名填給通關庶免久占無



益及每年量撥花布折糧銀兩再爲措置糧料解赴獨石等處選擇官房委官收掌以便年例折色給散并緩急支用仍于來年徵收夏稅會計之時量撥有麥去處前來上納以備出戰做炒支用庶使根本固實戰守有賴一在邊總兵鎮守等項內外官員中間有將所管官軍或貪圖小利私自放假或營幹已事私自役使令其過關并赴各處者假以收買軍裝取討盤纏等項爲名自出批帖任情差遣一月之內每一官員甚至有批差七八起

每起數十人者全不顧念前項官軍俱係邊城人數妨悞操守甚至姦詐小人往來之間生事害人及變亂黑白交構是非若不關防深爲未便合無今後除各衛所文引照例出給奏事人有關文照驗外其餘內外官員一應所管官軍公幹事件並不許自出批帖俱行所在提督協贊官處斟酌審看給批付照定限銷繳仍行居庸等關口一體遵守驗放如各官自出批帖出入遠去者治以重罪各處邊方恐亦不無此弊仍乞通行庶使人力



少紓事體得一

一宣府等處旗軍舊例有家小者月支糧八斗無家小者六斗以後增添八斗者支九斗六斗者支七斗近俱仍照舊減支查獨石馬營等八城堡口外地方砂磧之外萬山之中居人未歛而啼饑未冬而號寒官軍十分艱苦比之宣府又自不同人所共知又况今年嚴霜早降所在無收即日燒造磚灰採打柴木一交春和便須併力僨完赤城雲州等處城堡包砌工程并增置修補各處整臺正在用

工之際不得暫時休息合無將前項八城堡旗軍仍照九斗七斗事例關支待後修復完全屯種豐收之日另行定奪庶使饑寒濟利邊事可圖

一 朝廷爲見獨石馬營等處係是修復地方官軍數少將犯罪充軍修守等項發來着役本是良法奈此輩畏懼邊方縱有家小隨發者亦多買囑所司賣放或托故行取隻身前來因無顧戀繫絆不久即便逃回甚有哄誘久住軍人做伴逃去以此該管官旗加意看



守伏路挨拿見在官軍不得休息徒爾勞人  
終多逃竄合無今後例該家小隨住充軍等  
項所司務要行拘到日審係正身取具解人  
甘結牢固責發明白填註批文前來兵部仍  
行提督協贊官處知會驗放若有故托不到  
并人批不同者卽係賣放將解人送問明白  
編發充軍庶使人有繫戀事有實効

一近該兵部議擬具奏欽准將各邊各處總兵  
叅將等項內外官員帶去京衛官較人等盡  
數發回止留老成謹厚者三名誠爲邊方軍

民之幸近訪得多有延緩占愜不發者似此  
故違禁令誠爲禍患未除合無該部再爲通  
行催取上緊回還不許托故稽違及該部該  
科遵守今後如有出外仍隨帶多人意在朋  
結心腹生事害人者卽時劾奏不與准理庶  
使法令昭明軍民感激

一各邊遇有緊關聲息烟火飛報到京兵部議  
擬或請 勅或差人賫文各邊知會宣府一  
帶止行宣府而獨石馬營等處必待宣府或  
該府轉行方得知聞切獨石馬營特出境外



若有北邊聲息必先當知而相去宣府近二百里山路險峻又隔龍門衛關口緩急之間誠恐悞事合無今後遇有緊關邊報與宣府各另行遣庶使豫識敵情事機不誤

景泰三年十一月二十一日

題爲禁革欺公虧衆姦弊事節該欽奉

勅諭軍中一應姦弊爾須嚴切關防痛加禁約毋令下人夤緣作弊如違聽爾劾奏處治欽此欽遵照得萬全都司各衛所每年委官前赴京庫關領蘇木胡椒鈔錠回衛例該戶部差辦事官同委

官管領到衛公同給散其立法關防之意至矣乃前項官員多係姦貪無狀今訪得在京有等無藉之徒叫名攬頭遞年兜攬各衛所委官在家通同庫官委官及開張食店之家如遇該庫關出卽將原關好鈔并大塊有火烙印記蘇木真色胡椒俱各轉易藏匿貨賣重利私將爛鈔并淺淡蘇木黃杼等項抵換至於胡椒其弊尤甚先受店家財物將胡椒沸湯煮去辣味又將與椒相類樹子插和或又將麥麵打作熟糊攪入砂子鐵屑等物纏裹在外甚又有將關外土



砂插和者姦貪小人備極弊病臣切詳前項椒木鈔錠係是折與官軍俸給錢物動以百千萬計又價值高貴今姦弊若此使朝廷恩澤不得下流官軍俸給不得實惠物雖出於庫藏利悉歸於姦貪如龍門衛關胡椒八百七十四斤一十二兩八分於內盤折正數九十九斤一十二兩八分其餘俱係裹麵內將一斤洗淨止重一十二兩除將委官指揮施瑄另行叅奏外若不痛加禁約切恐在處皆然欺公虧衆深爲未便乞勅該部計議合無將前項胡椒照依洗

淨秤過數目每斤准一十二兩筭給其餘於犯人名下追贖原數給散其未曾給散地方如有前弊俱照此例今後遇有前項關領椒木等項到部其辦事官不必差遣另委廉幹主事一員前赴該庫眼同關出蘇木驗無火烙者卽爲印記椒鈔俱用牢固印信封貼責付委官收領通送提督都御史等官看驗別委的當上司給散仍行法司出榜禁約食店并攬頭之人如有似前作弊緝訪得出或因事發監追完結編發極邊衛分充軍庶使姦貪知懼恩澤下流謹題



景泰三年十一月二十一日

題爲邊務等事臣近於龍門衛等處整飭軍務間訪得宣府管事都御史李秉劾奏都督楊能而楊能奏秉貪淫等情欽蒙取回臣惟李秉係是風憲大臣久受邊方重寄朝廷取回或別有重用亦不可知若因其劾奏將官而被其訐奏遂用取回則臣有不敢不言者臣與李秉同事幾及半年觀其所存所行多欲執持公道護向窮軍雖管事頭目或有不樂而窮軍下人則切愛戴故謂李秉處事過當小不容忍輕易舉動

致瀆

宸嚴則誠有之若以貪淫加之實毀之太過臣伏見往時都御史年富累被多人奏其貪淫不法等情朝廷差官體察皆屬虛妄自後仍被誣陷朝廷明見悉置不問蓋風憲大臣身係重任在外行事稍求盡職未免忤衆所賴朝廷爲之主張然後公論庶幾不泯臣雖至愚亦欲朝廷以待年富者待李秉也況今邊方多事朝不慮夕以久處邊境稍有執持如李秉者卽被奏去則懦夫喪氣中人解體將來邊方之事尚



忍言哉臣愚伏乞

皇上宸斷特命公廉明正給事中御史各一員前赴  
宣府會同巡按等官將李秉楊能所奏事情逐  
一體訪審覆有無實跡明白回奏定奪庶得公  
論開明事體妥當李秉實嘗以才薦臣而臣爲  
此言似乎私比李秉願去邊境而回中朝爲李  
秉之計則得爲邊境之計則疎臣若避私比之  
小嫌忘邊境之大事則臣不忠於朝廷矣臣  
實不敢不忠謹題

景泰三年十二月十九日

題爲邊務等事近日累據獨石馬營等堡瞭見境  
外烟火不絕及該葛峪堡被賊搶去夜不收楊  
拴住等內張改兒脫走回還稱賊衆老小在於  
沿河下營等因照得東西一帶俱有烟火聲息  
顯是賊寇下營雖經選差夜不收前去哨探終  
不知是何部落若使多差哨探又恐墮賊奸計  
爲患非小查今賊酋也先并福餘朶顏等衛俱  
遣使入貢且以賀正爲名而賊衆在邊出沒隱  
見爲態不常既是捉去楊拴住等而張改兒不  
久又得走回奸計黠謀誠不可測會同都督孫



邊事存彙 卷一  
安議得若使醜虜誠意進貢止是遠在境外苟延殘喘臣等則當嚴兵自固保境安人耀武揚威使賊知畏不邀近功徐圖大舉此一策也若使醜虜陽爲進貢陰蓄異謀逼近邊牆意在深入當此之時或有可乘之機或有可擊之理或可以劫營決勝或可以取便成功臣等則當遵依勅旨其餘人馬器械亦各整擗周詳上仗朝廷威靈下責將士戮力犬羊無賴必不使之有得意之時但此虜各種部落多稱進貢在京倘以殺伐加之而中間虜酋或有以敗和渝盟生事邀功開邊啓釁爲言則于事體亦爲非便臣等不敢自專伏乞

聖斷進止使臣等邊境遵守而行不勝幸甚謹題

景泰三年十二月二十七日

題爲邊務事臣聞守窮邊者莫急于安人心息流言者莫重于嚴號令照得獨石馬營長安嶺保安永寧一帶俱正統十四年失守地方卽今

皇上中興用人悉已收復堅甲利兵謀臣猛將所在而有以故逆虜聞風知有畏憚乃有小人妄生異議鼓扇愚人或以爲守邊官員走入虜境或



以爲各堡官軍仍要掣回或以爲邊報賊情如何嚴急以致無知之人不審虛實輒便驚疑一聞流言憂惶無措臣與都督孫安等再三詢察多是比先棄城逃走之徒或託故存留在京或怪恨拘發原衛僥倖脫罪不知感恩乃更造言以爲得志若不嚴加禁約必致壞事方來除會同孫安等曉諭終是愚人易惑難曉臣愚欲乞

### 朝廷特降

聖旨榜文謂此處邊方往事悉不追究卽今復守內外文武官員統理錢糧軍馬日已增益墩臺城

垣漸已堅完 朝廷顧念邊方時刻不忘在邊之人當場忠固守以爲保障如有倡爲異議流言搖惑人心意在棄城逃走悞壞大事者許臣等指實叅處以極刑示衆仍籍其家賫捧前來于各該城堡永遠張掛并戒飭內外官員亦須潔已正身鎮靜持重以安下人以圖大功臣職守邊境事切安危豈容緘默伏望

皇上以窮邊社稷爲念密切詳議特出

聖意施行臣不勝激切之至謹 題

景泰四年正月初四日



題爲邊務事 朝廷今日防邊重鎮其大者大同  
宣府而其中緊要莫先獨石馬營至長安嶺一  
帶地方此而失守則宣府迤東居庸迤西保安  
懷來榆林土墓皆爲盜區雖有大同宣府道路  
梗絕莫如之何往年舊事所不忍言追惟  
祖宗在御之日寧棄開平專守獨石增兵築堡務擇  
名將高其爵位付之重兵遠慮深謀昭然可見  
前項地方自經失守以來或以爲不足守或以  
爲人力不足未可守

皇上力排羣議命都督孫安以復守之而孫安仰體  
聖謨盡心所事卽今初見功蹟漸有頭緒但雲州赤  
城二處包砌尚未完全各城錢糧人馬數目未  
及舊日加之近日邊報愈多賊情朝暮不保正  
在汲汲脩爲之際而管軍大臣必須崇重其名  
號責成其職守庶幾邊事可濟大功可成緣孫  
安止是提督守備別無將兵名目宣府雖有總  
兵副將等官一則西路邊關尚多一則獨石孤  
懸路遠緩急不能相通利害所關事體不小且  
孫安官至一品恩寵已極臣爲此言非敢代求  
陞官進職特欲加與名目使于行事便利於地



方有益耳臣愚伏望

皇上宸斷特命該部會集看詳臣言如果不妄則乞請勅孫安充副總兵名目凡事仍依先次勅旨與臣等共同計議而行邊境幸甚謹題

景泰四年正月初四日

題爲邊務等事照得口外開平等衛所在京官軍柳春等先因戶部督發過口外都督楊俊因奏要作夜不收名目出口哨探等用畱住在京緣前項官軍原在邊上比先棄城逃走朝廷旣不加罪使之照舊守邊乃是各人本等柰何各

人因見邊境苦寒畏險地面用計鑽營託故捏詞占恡畱住訪得前項官軍皆非良善卽如累次作夜不收名目差來出口哨探王成王良王隆等託以幹事因而生事甚至勒索守邊都指揮銀兩都指揮不得已科歛各軍送與見今事發奏提未結夫以今日之危邊今日之貧軍尚且忍心剝害其餘不知分限傲上凌下有不必言者此各邊官軍皆以爲夤緣在京者反得以縱肆安分守邊者更受其剝害人心不服物論不平奸猾之徒便思倣倣將來邊境坐見空虛



脫有緊急何以爲禦况今日外官軍數少遠調  
河南官軍前來輪班操備而口外官軍復爾畱  
京以理論之斷然不可如以前項軍人能幹當  
畱在京又大不可者邊軍京軍之屏障必邊軍  
安然後京軍安邊軍不足濟用京軍豈能獨安  
又况此輩戰士耳非若經濟臣寮可當重用堂  
堂天朝貔虎百萬何莫非可用之人而以此輩  
爲輕重哉臣職守邊境義當盡言如蒙准題乞  
勅該部通查柳春等并口外衛所原操守官軍見  
在京居住者連家小盡數押發前來各該地方

屯操守戰實爲允當謹題

景泰四年正月十五日

題爲緊急邊務事景泰四年正月十九日欽奉

勅今特命都督楊俊都督僉事劉深充遊擊將軍分

投前往宣府獨石萬全懷來保安等處地方協同

爾處官軍用心操守欽此欽遵臣等切惟獨石一

帶地方係是都督楊俊等所領官軍比先捐棄

不守本官將平日羽翼狡獪奸詐之徒一向帶

同在京爲見臣等復守此處其心以爲今日之

守爲是爲功則前日之棄爲非爲罪千方百計



使令前項小人在京或來本處地方捏造流言  
望空駕說動搖人心沮壞邊務且如往年指揮  
劉鑑因見都督孫安到馬營獨石復守忽于樺  
皮嶺放砲報有虜寇進犯又如近來無故令千  
戶黃敏栢四等前來接去先前棄城降調都指  
揮黃寧稟帖其中所稟不言可知又令百戶楊  
能越過長安嶺幹事被把關官黃義奉臣禁約  
不容放過本人怒罵而回前項俱有供詞實跡  
在官以致近日獨石開平衛等處節次輕報營  
火臣與孫安訪得前項機關拘究守整指揮等

官劉剛王敬等審出前情痛加懲治諭以前項  
奸計止是流言不許驚疑臣將官軍夜不收王  
成等生事欺詐銀兩奏乞發回及請給榜文禁  
約具題去後連日人心安妥烽火不驚且口外  
官軍大槩使之守邊則怨誘之腹裏則喜今次  
獨石等處遊擊京軍若令楊俊統率必又帶同  
前項狡獪小人別生事端壞事非細古人有言  
敗軍之將不可言勇縱使 朝廷寬大用人此  
輩亦何面目以見口外之山川土地與其舊日  
之莊田墳墓乎乞專勅都督僉事劉深前來獨



石等處領軍行事庶得人心悅服邊境無虞臣等職守邊境大計所在緘默不言俟壞事而後言之則於事無補於罪難追臣等冒干天威俯伏俟命之至謹題

景泰四年正月十九日

題爲月糧事據龍門衛申

云

云具申行間又據守

備都指揮黃瑄等亦呈前因叅照所申官帶總旗馬真先有侍郎劉璉該准戶部咨查追本旗冒支八箇月月糧未曾還官於法有違合當追問及照申稱本旗跟隨都督等官宣府巡哨而

本城相離宣府一百二十餘里今指以查取月糧前來不知有何緣故一節夫本旗如果跟隨巡哨自合時刻不許摘離領軍頭目以備警急調用緣何非奉明文差遣輒自往來一百二十里之外越過龍門關口顯是本旗曠職偷閑不守職役尤恐中間別有虛詐事情除行該衛將本旗拘留外乞勅戶部行移總督邊備都御史李秉將馬真取問通查前項冒支月糧緣繇明白追徵還官以杜奸弊仍乞勅兵部查照馬真是否跟隨巡哨之人緣龍門衛正係邊衛



邊奏存彙 卷一  
缺官用人地方本旗又係本衛旗役合無追問  
畢日就行收發本衛差操謹 題

景泰四年 月 日

題爲緊要邊儲事近該戶部爲獨石馬營二處糧  
少及天年不收無從收買奏准召人僱運糧料  
八萬石前來邊人聞之不勝感激後因獨石馬  
營路遠無人應召又該本部 奏准予順天等  
三府起倩民間車輛關與脚耗蘆蓆運來然亦  
止運糧料五萬三千石今尚未完臣訪聞得如  
粳米一石 京師通州直銀三錢三分之上又

每石關脚銀六錢耗米二升每三石蘆蓆一領  
則是以銀一兩然後運米一石得到獨石况兼  
所起車騾係順天等三府爲畿內根本股肱之  
地兵餘之民衣食產業百計所出一家所靠之  
物馱之遠出沙漠之外萬山之中車騾死傷多  
至賤賣比及還家十存三四者有車畜不給之  
家將官關脚耗蘆蓆外又加銀五錢僱募脚家  
赴倉交納者有至懷來全道中途車摧牛斃重  
別出銀僱脚到倉者繇是而觀 朝廷擘畫之  
焦勞下人轉運之辛苦臣身叨職守邊親見艱



難不覺隕涕但今日外糧少倉分又不止于獨石馬營二倉目下僅可支吾全無積蓄若以往拋棄百萬之餘較之則今十尚不及二三雖有鹽糧等項多因路遠利微不肯完納除儘力整理今年耕種及用心修葺各處倉廩外緣今虜使已回貪饕之心既不深遂侵犯之毒勢有必然若糧料不足縱有城池軍馬其爲守戰亦難經久旣恐夏秋警急緩不及事尤恐京軍動調必費支持不可不爲之計看得宣府萬億庫收貯折糧銀兩數多可以措置轉換得粟入倉實

亦足邊一策今將酌量計筭到北京宣府等處可以上米關銀之人地方路道遠近險易順逆之宜斗頭上下多少之數開列上聞乞 勅戶部計議或可依擬給榜于在京并宣府獨石等處城堡曉諭自今春起直至今年秋月屯種成熟有米價賤之日不拘官員軍民客商人等隨其所有米荳等項糧料不必預先報名妨占不必限以石數多寡自十石以上悉與隨到隨收照數出給通關費赴總督邊儲官處依例發屬支與銀兩如此則覓利之人自然營運而無怨



公私錢糧出納穩當而無失視之前項僨運并  
諸色措置最爲容易倉廩可待自足警急可保  
無虞倘以臣愚智識短淺計量不周乞 勅該  
部及總督邊儲大臣講求別項足邊長策早爲  
施行所貴無後時之悔有足食之謀開坐具本  
每官銀一兩各倉該上米荳數目

獨石廣積倉一石

馬營廣盈倉一石五升

雲州堡倉一石一斗

赤城廣備倉

龍門廣盈倉

龍門倉俱一石一斗五升

鵬鶚堡倉一石二斗五升

長安嶺倉一石三斗五升

景泰四年二月十四日

題爲陳情乞恩事臣繇進士蒙 恩授官兵科給  
事中敬蒙

皇上令掌科事將及考滿欠四箇月零蒙恩陞本科  
都給事中又將及考滿欠七箇月零蒙恩陞山  
西布政司右叅政臣本凡劣誤被國恩歷官皆



未及考滿卽荷陞遷大德深仁如天如地切念  
臣有父葉春見年六十七歲同繼母沈氏俱在  
原籍直隸蘇州府崑山縣以臣歷官不曾經錄  
考滿未受封命臣于去年三月叅政命下之日  
臣之所知憐臣親老者謂臣當以給事中都給  
事中兩任年月併補上疏乞恩臣竊自謂初命  
外藩豈可輕有煩瀆以此不敢上陳茲者復蒙  
恩令于獨石等處管事近得臣父家書備言老  
病艱難情狀緣臣幼年喪母賴臣父同臣繼母  
鞠育長成風燭之年爲日有幾父子私愛痛徹  
心腸以此不得已冒犯天威爲

君父言之伏望

皇上憫臣兩考給事中都給事中俱及二年之上今  
任叅政又將一年其于都給事中右叅政誥勅  
俱不敢分外希望本身與妻亦不敢僥倖請求  
欲乞

聖恩憐憫止以給事中勅命封贈臣父母使臣父母  
生者榮身死者瞑目微臣一身生當隕首死當  
結草以報 國恩臣情逼志悲似忘廉節惟

君父聖慈能察其心寬其罪而加矜憐焉臣不勝感



懼之至

景泰四年二月十四日

題爲軍務等事景泰四年二月十八日臣與副總  
兵都督孫安率領赤城堡都指揮等官并管屯  
官員鄭祥等前往城西堂子西衝相度築立墩  
堡地形本日巳時行至周馬兒衝有都督孫安  
在于馬上忽覺語言蹇澁手足軟弱隨即同回  
至堡調治今尚未痊緣口外醫藥俱不甚便兼  
都督孫安平日素聞御醫盛宏醫藥高妙欲乞  
聖恩憐念邊將特令本官將帶藥餌前來醫治不勝

感恩之至謹題

景泰四年二月十九日

奏爲謝恩事景泰四年二月二十八日有原差  
賚本夜不收王忠回還恭審順賚臣所陳乞給  
事中勅命題本該奉

聖旨與他都給事中勅命吏部知道欽此臣不勝感  
戴

聖恩謹具奏稱謝者伏以聖皇以孝而爲治大推  
慈愛之心小人爲親而陳情過遂顯榮之願伏  
念臣盛窮邊遠跡下土微生言路兩遷切荷收



憐至厚藩方庶事深虞補報惟艱頃緣父母之私輒干

君上之聽乞慙程子不得已而上章喜動毛生豈偶然而捧檄茲益伏遇

皇帝陛下仁如天覆敬與日躋尊尊親親極宮闈之至禮老老幼幼來黎庶之交懽是以能弘再造以勸忠使之得全一節以致養良繇

天意豈假人爲本圖沾被爲榮敢料寵頒非望一家有幸誓殫犬馬之誠萬壽無疆載祝岡陵之福除嚮闕謝恩及將該保勘封贈緣繇咨

呈吏部外具本稱謝以聞

景泰四年二月二十九日

啓爲謝 恩事景泰四年二月二十八日有原差賚本夜不收王忠回還恭審順賚臣所陳乞給事中 勅命題本該奉

聖旨與他都給事中 勅命吏部知道欽此臣不勝感戴 聖恩謹具啓稱謝者伏以前星麗彩屬萬邦貞正之期 中出覃恩慶千載遭逢之幸伏念臣盛官叨三品藝乏寸長久聯侍從之班朴愚無補濫受窮荒之寄拙鈍奚堪惟親老在



下而 恩旨是求適 聖明在上而 命書見  
錫光生存歿榮及州閭茲益伏遇

直聰明睿聖之資秉恭儉溫良之德尊師重道  
豫聞學業之緝熙侍膳問安益見孝誠之純篤  
肆 絲綸之降俯就物情蓋宮庭之居端臨  
皇極祇慙異數特及凡微懽騰數口之家 澤  
自九天而下手足腹心同一體願披丹悃以輸  
忠左右前後皆正人更望青帷而獻頌除 嚮  
闕謝 恩及將該保勘封贈緣繇咨呈吏部外  
具本稱謝以 聞

景泰四年二月二十九日

葉文莊公邊奏存彙卷一



葉文莊公邊奏存藁卷之二

吏部左侍郎謚文莊崑山葉盛存藁

孫衡州府同知 夢淇較定

六世孫工部主事 重華彙梓

題爲軍務等事照得近該奉 勅諭令臣於獨石

馬營等處協贊都督孫安整飭軍務收放料糧  
及關防禁約軍中一應奸弊除欽遵外今照臣  
所管軍務防奸革弊一應題奏行遣文書事體  
重大况兼收放糧料奸弊尤甚每月書填各城  
各倉收放糧料勘合數多俱是錢糧數目緣無



關防行使誠恐奸人作弊難以辯驗查考乞  
勅禮部鑄給協贊軍務關防付賁本人領回收  
用庶文移章奏奸僞不生邊儲軍務不至悞事  
景泰四年二月 日  
題爲邊務事案照先該臣題乞令兵部通查都督  
楊俊存留在京口外官軍發來各該衛所屯操  
守戰等因該兵部覆奏節該欽奉

聖旨楊俊留與他十名其餘都着回原衛所操守欽  
此欽遵該部照會前來已經通行知會及行都  
督孫安備行各該衛所出批差官催取去後經

今月久未回誠恐前項官軍又復結構差官鑽  
刺延住營求差使生事害人乖張事體沮壞邊  
務乞 勅兵部查照先次奏准事理從公督發  
庶免奸頑得志事體紛亂謹題

景泰四年三月初十日

題爲邊務事承准兵部照會前事兵科抄出臣題  
案照先該臣題乞令兵部通查都督楊俊存留  
在京口外官軍發來各該衛所屯操守戰等因  
該兵部覆奏節該欽奉

聖旨楊俊留與他十名其餘都着回原衛所操守欽



此欽遵已經通行知會及行都督孫安備行各該衛所出批差官催取去後經今月久未回誠恐前項官軍又復結構差官鑽刺延住營求差使生事害人乖張事體沮壞邊務乞 勅兵部查照先次奏准事理從公督發庶免奸頑得志事體紛擾該奉

聖旨兵部知道欽此欽遵抄出到部查得先該太監張永題乞將前項官軍存留哨馬營安插操練等因奉

聖旨准他留在三千營操練聽用兵部知道欽此欽遵抄出到部已經通行去後今抄前因合再照會前去照依太監張永奏奉欽依內事理欽遵知會等因臣照得前項官軍合當發回原處必難存留在京備細緣繇具見先次奏詞兵部覆奏要留二十名已非公論幸賴 聖斷止留十名其餘俱各發回原處至公至明不勝仰戴今承前因臣惟天下之事止於一公而已若事出非公雖屢變而無害若事繇公道當一定而不易前項官軍累經兵部督發過口都督孫安奏討學士商輅建言累累不蒙發回今幸公道開



明又被中道止遏緣太監張永奏留之時

皇上萬機之繁豈必究詳原奏既奉 欽依兵部知

道自當查理執奏不可爽信虧公比及催取奏

至卽非常行事務亦當通行查奏請 旨定奪

督發施行庶得守信從公不碍事體臣本非才

過蒙委任若使依阿承順公道不立恐悞邊方

大計罪禍非輕乞 勅兵部會同從公查理臣

先次奏准事理督發施行謹題

景泰四年三月二十二日

題爲邊務事據守備西貓兒峪馬營周賢呈該兵

部議擬奏准都督楊能建言事理有警着令領  
軍與大同宣府官軍互相期約出奇勦殺等因  
案查先該都督孫安具奏兵部奏准令於馬營  
專一操守今又奏前因欲便遵守柰緣本營馬  
隊止有官軍二千四百餘員名內除無馬官軍  
五百四十餘員名令其專一屯種其有馬官軍  
一千八百餘員名又要守城守瞭并長哨夜不  
收等項止有一千五百餘人抑且地臨極邊逼  
近胡虜四通八達最爲緊要喉襟之所宣府懷  
來藩籬先年達賊犯邊俱從大小石門樺皮嶺



并獨石等處入寇所繫非輕設若有警本職將  
領官軍前去會合出哨恐賊譎詐儻有掩襲聲  
東擊西一旦又從本營地方突入侵犯本營孤  
懸狄境人少力弱外實裏虛猝無應援使進退  
不能成功必致悞事况獨石馬營雲州等堡人  
馬已有 欽命宣府副總兵都督等官孫安等  
提督節制管轄各城又有分委都指揮等官職  
掌豈敢擅自調領如有警急若領本營官軍出  
戰則營堡空虛缺人守備若依先奉原議勘合  
事理專一操守則又違慢今奉欽依得罪非輕  
進退兩難理合通行具呈乞爲照詳定奪庶免  
悞事具呈得此伏念臣以一介書生叨受邊寄  
藩臣之體本當奉行命令但邊事甚大理難緘  
口况周賢所言亦爲有理臣更請以周賢所未  
言者爲

陛下言之臣聞兵法有曰知彼知己百戰不殆又曰  
能守而後可戰兵法未暇論楊能獨不知往年  
獨石馬營楊俊棄城之事乎獨石馬營口外各  
堡俱是唇齒堅壁足食足兵人各專城別無沮  
撓尚且一籌不展棄城而逃今大同迤西至右



衛宣府迤東至獨石相去數千百里重山峻嶺  
深溝斷澗自口外龍門迤西邊墩之外別無設  
置一有聲息動輒梗絕楊能乃欲以不可測度  
之賊情以貧難復守之士卒以轉輸有限之糧  
草預爲會合之過計遠赴數千百里之期約臣  
誠愚昧未見其可其言似乎可聽其事未必可  
行可以動廟堂而不可以欺邊人可以惑一  
面而不可以掩衆目臣與都督孫安等在邊但  
知無事之時愛軍惜馬脩器械謹烽火嚴兵自  
備慎固封守酌量人力增脩墩堡于以制要害

之虜衝于以便耕作之人畜近又將往年貪黷  
總兵鎮守内外文武官員莊田數百餘頃一一  
勘出分派貧軍使之分班操練儘力屯種以養  
人力以收人心設若旦晚有警恃我之逸乘彼  
之勞守戰隨機應變在我使賊欲爲久住則野  
無所掠而動止狼狽欲爲南牧則恐躡其後而  
首鼠狐疑犬羊無賴坐取敗亡必不使之有得  
意之日且幸邊境小康天年豐稔庶幾人力稍  
裕人心稍孚以須軍政脩明士氣振作復讐大  
舉豈無其時而又上賴



陛下盛德九重之上根本之地進君子而退小人百  
官之衆心術之微戒陰邪而勉忠直下服人心  
上回天意區區也先逆賊將呼之而不來驅之  
而不行矣臣迂濶之見犬馬之誠端在於此若  
如楊能建言所謂會合大兵蕩滅腥醜臣實未  
聞蓋哄弄虛頭說大話素非臣所能開邊結  
釁亦臣所不敢古人有言曰生事邀功終匪

朝廷之利願

陛下無忘此言臣又竊有獻焉今日邊上大事臣之  
所憂蓋不在於宣大之不能會兵而特在於宣

大之官多而不和望 朝廷力爲調停早爲主  
張邊境幸甚臣非不知和同靜默可以固位  
嗷忤衆足以取禍顧以疎遠之跡受恩深厚今  
爲此言在 廟堂爲忠告在

陛下爲獻忠况國之大事在乎兵戎而又爲邊臣之  
職守反覆思之不能自己諒

陛下必不以徇私妄言沮撓邊事疑臣咎臣所據周  
賢所呈乞 勅兵部計議定奪施行謹題

景泰四年四月初七日

題爲邊務事照得鎮守獨石等處副總兵都督同



知孫安自今年二月得患風疾以來至今未能  
平復雖是勉進藥餌然手足不時疼軟動履艱  
難緣獨石等處係緊要地方卽今夏秋之際係  
防寇時月誠恐萬一有警緩急悞事會同議得  
前項地方係是復守人心未甚安妥人力未甚  
寬裕必得熟諳邊事寬猛相濟之人提督守鎮  
庶幾可望事濟功成今看得本處獨石守備都  
指揮張林質直老成曾經守戰馬營守備都指  
揮周賢性資英銳膽畧出羣及照在京都督僉  
事劉深今年領軍出關直抵宣府而回一路往  
來軍政修明人心悅服乞 勅兵部詳審計議  
合無於都指揮張林周賢內量選一員照舊於  
赤城居中提督其守備官另行推補惟復特命  
都督劉深鎮守地方再照都督孫安雖有前疾  
但本官復守前項廢棄地方頗効勞動更乞  
朝廷起取回京量加優待令其調理安痊聽用  
不勝幸甚

景泰四年五月十三日

題爲禁約無益害軍奸弊事伏覲

皇上卽位以來 詔令所頒無非仁政



邊奏存錄 卷二  
詔有曰各處寺院止許曾給度牒僧人住持爲國爲民祝厘如無度牒及頂他人度牒并不落髮之人假稱僧徒在各寺院占住躲避差役者詔書至日令各首官還俗悉宥其罪違者起發口外充軍里老四鄰不舉首者罪同欽此詔又曰在外造作除軍需倉廩修理城池并隄備水患疎通糧道外其餘修理公廨衙門鐘鼓樓寺院等項但係于礙工程浩大動勞人衆不急之務雖曾奉有勘合亦暫停止以寬民力不許指此爲繇科擾害民欽此天下之人曉然皆知

皇上有不忍人之心有不忍人之政真大有爲之君也斯世幸甚臣近看得口外地方神棲廟宇寺觀庵院祠堂碑亭不啻數千百處數千餘間俱是比先邊境無事總兵鎮守等官剝削下人科歛財物尅減糧料私役軍餘蓋造古人所謂衆以爲金碧熒煌臣以爲塗膏釁血正此謂也又訪得比時多有無藉奸懶喫糧軍人投充善友假以供奉香火爲名甚至私自披剃爲僧每處積至一二十人不徒影射身體躲避差操有等官員且加敬禮送與衣食置立莊田撥軍耕種



每年有收至米穀千餘石者夫此等官員其一身之貪婪役占已自不可勝言而又幹辦此無益有害之事置操練而不問視邊備如等閑以致軍士之銳氣喪盡下人之怨嗟充塞一旦有事鮮不債壞至今口外雖婦人女子皆謂昔年若以金閣觀一半工程材料包砌雲州之城虜賊如何得進邊民何至逃散蓋金閣觀在口外極其壯麗而口外之人動心逃走與夫賊之敢爲肆行者皆以雲州先破而雲州之破爲不曾包砌城垣故也此雖愚下之言自是當時實事緣今各處自經擾攘之後居人艱難墩臺樓櫓多有未完原額官軍多有未足語屯種則開墾之人力未敷語守戰則教養之人心未固若不嚴加禁約早爲申明不惟有負

皇上明詔盛心誠恐此風復起覆轍復蹈其爲悞事可勝言哉然口外一隅所見如此四方萬里未必不然乞 勅兵部計議通行各邊關鎮守內外文武官員及各該司府州縣欽遵節次 詔書事理今後自非祀典神祇壇廟不許興工脩理及重別再有創造其占住寺院之人仍許自



首違者罪之如有故違擅興土木勞民傷財及縱容躲避役使耕種等項奸弊許該地方官劾奏施行其口外尤甚艱難原有住持去處亦合暫緩候邊事十分寧息軍民俱各飽暖然後量與舉行謹題

景泰四年六月初一日

題爲急缺邊倉收糧官員事案照先據雲州堡等倉收糧吏目王鑑安吉等各告

云

云

具告得此

審看得雲州堡倉吏目一員王鑑年六十歲赤城廣備倉吏目一員安吉年五十六歲各官年

老日昏精神疲倦難以收糧是實所據告要守支一節查得先該臣等看出直隸保安等州萬全廣積等倉副使張本等關茸悞事奏乞選官更替該吏部奏准選官更替將張本等原收糧斛交沿與見在新任官員收掌支銷其張本等送部定奪去後今照吏目王鑑安吉雖有經收糧斛緣俱係先今守支見任該倉副使眼同經收不係接管更替今各官旣已年老不能管事若不照例起送又令守支誠恐虛糜廩祿未便及照鵬鶚堡倉收糧吏目逸清于景泰四年五



月內爲事問送都察院長安嶺收糧吏目劉祥  
于本年六月內丁憂去訖龍門倉久缺收糧州  
官未經銓選今照口外各倉見蒙坐撥浙淮長  
蘆運司引鹽共四十五萬四千有餘該米豆一  
十八萬三千餘石及本年夏秋稅糧并僨運贖  
罪等項糧料米豆數多數內除獨石廣積倉馬  
營廣盈倉龍門廣盈倉俱有直隸隆慶州判官  
一員管事外其餘俱各急缺官員管理收受乞  
勅吏部將吏目王鑑安吉合無令其守支惟復照  
依張本等事例選官更替原收糧斛交沿與見  
致虛糜邊儲不致失悞謹題

景泰四年七月十七日

題爲守備官員事照得守備雲州堡沈禮見年六  
十之上精神疲倦緣雲州堡係緊要地方必須  
守備得人然後不致悞事况今賊情不測守禦  
尤當加意會同總兵孫安計議得萬全都司隨  
操都指揮使李剛年力強壯驍勇有爲乞 勅  
該部令本官于雲州堡守備與同協同指揮陳



忠同心協力以理邊務誠爲便益謹題

景泰四年八月初八日

題爲邊務事景泰四年八月初八日准兵部咨呈  
抄出都御史李秉題照得近年以來迤北進貢  
使臣皆在宣府住劄先該兵部爲因宣府軍馬  
數少恐被虜賊覘其虛實奏准命將領兵前來  
防範虜使出境壯觀邊城軍馬之盛潛消虜使  
覬覦之心誠邊境之幸社稷之福也但緣宣府  
官軍今年本處及出境採打秋青草止勾餽飼  
騎操馬疋而年例草束僅勾祇待使臣馬疋之

用在場蓄積草數不多加以今歲荒旱無收入  
心憂懼虜使回還之際若用在京官軍前來未  
免糜費糧草急難措置臣今年春與總兵楊能  
前去白廟兒會同副總兵孫安勘議修築墩堡  
言及虜使回還動調官軍赴邊一節有孫安說  
稱比先虜使將到口外官軍會調宣府擺列卽  
今日外城池已完軍馬頗多虜使來時照舊摘  
撥人馬協助宣府擺列庶免疲勞京軍坐食糧  
草臣今會同議得虜使貢期在邇防範之策固  
不可不嚴糧草之費亦不可不慮若不預先處



置誠恐臨期悞事伏乞

聖裁勅該衙門從長計議合無今後如遇虜使往來  
宣府總兵等官預行副總兵孫安量撥彼處各  
城精壯官軍二三千員令的當頭目管領于九  
月末旬量備行糧馬草聽候若遇虜使往回飛  
報各官催調前來協助擺列以壯軍士之氣以  
寒虜使之心候其赴京及出境之日各回本處  
操守如此則軍容振肅而虜使知懼糧草有積  
而轉輸不勞具題奉

聖旨兵部知道欽此欽遵抄出到部參照所奏雖稱  
前因緣宣府各城者京師之屏蔽而獨石一帶  
又爲宣府之藩籬也虜使數年以來朝貢往復  
俱繇此處其內外遠近事體緩急軍馬多寡無  
所不知兼且此輩名爲摠誠入貢實則窺伺邊  
境萬一動調獨石軍馬前來宣府擺列而彼處  
却有聲息則是城堡空虛人心危懼未免彼此  
不能應援別生意外之虞往事之失不可不監  
况獨石各城軍馬甚少若調去二三千員名必  
致缺軍守禦有此窒礙本部難以遙制定奪合  
無行移孫安葉盛再行計議及體問孫安比先



曾無擺列其于邊情事體有無違礙如果相應  
調撥可保地方城堡俱各無虞倘有聲息彼處  
見在官軍自足捍禦守戰不致失機悞事宜從  
動調前來宣府擺列以壯軍威仍具數開奏若  
是事有空礙難于動調及比先不曾許借軍馬  
亦將實情備繇回奏定奪務在處置停當有益  
邊務不許朦朧徧徇自取重罪具題奉

聖旨是欽此欽遵咨呈到府移咨准此照得孫安先  
在白廟兒會議築堡之時雖曾議論前因卽非  
目今事體今該前因會同議得樽節糧草固爲

國之良規而保固地方尤邊境之重事今照口  
外八城雖係宣府地方南界長安嶺西隔龍門  
關山岡陡峻路程寫遠緩急之間往來不便以  
此擺列接送使臣先年雖曾動調自經捐棄復  
守以來其宣府擺列止是摘撥附近萬全蔚州  
等處軍馬不曾動調口外又况見在軍馬數目  
不及往年只因糧草措辦艱難未敢請乞增添  
亦不敢撥發別用且各城又係極邊孤懸虜衝  
向來屢報烟火近日聲息尤多目今整棚所部  
人馬專備早晚守戰况虜使之來誠爲難保平



邊奏存稿 卷二 一五 三五七  
居尚且戒心此時尤宜加意所據前項宣府擺  
列官軍有此逐項窒礙難以動調謹題

景泰四年八月初九日

題爲馬匹料苴事景泰四年八月十六日據萬全  
都司呈抄蒙都御史李秉案驗准戶部咨仰將  
馬匹料苴每年自十月初一日起關支次年四  
月初一日止就便住支備蒙具呈行據隆慶左  
等衛操備指揮朱通等備旗軍朱回兒等連名  
狀告俱自宣德年間選來操備馬匹料苴俱自  
本年九月十六日爲始至次年四月十五日止

連年關支今將馬料自十月初一日起至次年  
四月初一日止除去一箇月料苴馬吃枯草日  
漸瘦弱誠恐悞事等因具題抄出到部節該本  
部查得舊例在京操備馬匹每年自十月初一  
日起關支料豆至次年四月初一日止住支其  
草束令各軍自備喂養正統十四年間爲因賊  
虜入寇中外戒嚴軍士不得採草馬匹不得收  
放是以暫改舊例將京邊操備馬匹有自九月  
十六日起關支者有自九月初一日起關支者  
是皆一時之宜非爲經久之例卽今虜寇感化



邊方寧靖腹裏人民供給疲弊已經奏准通行  
各邊總鎮及管糧官員將各邊官軍騎操巡哨  
等項馬匹料莖俱照例每年自十月初一日起  
關支至次年四月初一日止就便住支其草束  
仍令各官軍採積喂飼若有不遵妄費邊儲並  
聽鎮守并管糧官將該管官員指實具奏拏問  
去後今該前因參照前項馬匹料莖關支起止  
月日係干奏准通行事例難便更改案呈合行  
移咨煩行各該衛所將前項馬匹料莖仍照見  
行事例關支倘遇住支時月果有警急戰守應

該支給料莖另行定奪施行具呈得此會同都  
督孫安議得即日秋高天氣嚴寒又况今歲雨  
少七月十七日以來節降嚴霜荒枯備盡馬草  
無處採打騎操馬匹見今脹息比之往年十分  
不同若再減去半月料莖未免愈加瘦損有警  
必是悞事再照口外地方極臨塞北山高風猛  
節令不同難比口南腹裏又兼獨石馬營連日  
累報瞭見人馬聲息儻賊侵犯全賴馬匹追勦  
若不關支料豆實恐有警不堪馳驟調用不前  
失悞大事審得都指揮鄭祥等稱正統年間楊



洪奏准每年自九月十六日爲始關料至次年  
四月十五日止住支欲行查例緣文卷已于正  
統十四年擾攘拋棄無存如蒙准題乞 勅戶  
部查照先年口外奏准已行經久事例關支料  
豈喂飼庶使馬匹腴壯不致悞事臣係守邊官  
員不敢坐視馬匹疲損亦豈敢妄費不惜邊儲  
謹題

景泰四年八月十八日

葉文莊公邊奏存藁卷二

葉文莊公邊奏存藁卷三

吏部左侍郎謚文莊崑山葉盛存藁

孫衡州府同知 夢淇較定

六世孫禮部主事 重華彙梓

題爲走回人口事據守備西猫兒峪馬營周賢等  
呈備袁能等呈蒙差出境哨探賊寇與魯或掃  
道具實回報蒙此依蒙于本月初一日晚從厦  
兒嶺門出境分爲三路至初二日未時哨至地  
名龍王堂衝口瞭見達賊精兵人馬約有一百  
餘騎往來打圍別無與魯及瞭得本衝迤西山



梁東西人馬掃道一條備報具呈得此案照先  
准本府咨前事已經行令哨探及行宣府總兵  
官過興等會議開今呈前因會同議得出境勦  
賊方畧除宣府一帶將官地方徑自調度處置  
其口外八堡雲州鵬鶚長安嶺人馬止勾守城  
新舊馬五千餘匹內新馬一千以上存留守護  
城池難動合用隨征聽調精銳頭撥馬步官軍  
馬營合調一千員名獨石合調五百員名龍門  
衛合調四百員名赤城合調七百員名龍門所  
合調四百員名管領頭目張林周賢之外合令

守備都指揮鄭祥黃瑄張壽張傑等內定用神  
鎗火器合行欽差守備獨石馬營等處內官弓  
勝陳莊管領俱各整點隨軍什物糧炒等項齊  
備刻時定日臣等身先督領一路于馬營屢兒  
嶺境門內一路于赤城野鷄山境門內取齊先  
行分差垂覺夜不收再行抓探賊人臨時的確  
去處或可以遇夜劫營或可以乘便追殺又在  
觀時應變不可執一預定至期或約會前進或  
分道兼行遇賊當先奮勇以圖成功其發兵日  
期合候請 旨至日密切施行再照前項瞭見



打圍賊衆多是兀良哈部落觀其東西往來料  
必不止于此中間有爲也先腹心鄉導者有被  
伊捨散做賊偷馬打圍過活者有假託打圍窺  
覘埋伏勾引我軍者况其圍場去處散漫不一  
今朝明日迄無定向中間譎詐事機實難輕易  
測度些小孤軍旣不敢輕易舉動必須選調各  
堡精兵亦不過三千有餘守備城堡官員須用  
提兵聽調仰賴

朝廷威靈將士効力必保萬全然又不敢不爲一得  
之慮萬一此賊聲東擊西勾引我軍出境別有  
意外侵犯結連之虞卽今口外八堡脩復未

如病人乍起如破器再完驚散之人心未能固  
結疲竭之人力未得精強少有不周急難措置  
又况此輩殘賊向來俱各苟全喘息不敢犯邊  
縱使掩襲一二不足雪耻復讐待其罪惡貫盈  
庶幾滅亡有日兼且賊酋也先陽託和好今又  
貢期在邇尋伺釁端不可不慎再三計議得賊  
若不行犯邊上緊操練軍馬加意休息士卒養  
威蓄銳耀武揚威謹慎烽火嚴飭邊防常如寇  
在日前不許斯須怠忽設若此賊敢犯我邊或



逼近夾牆則理直在我纒曲在彼兵出有名師  
行無敵恭行天討此其時也古人有言曰敵加  
于已不得已而起者謂之應兵應者勝其此之  
謂歟臣等職在守邊非不欲建立功勳希慕爵  
賞但有前項合當計議定奪緣繇不敢苟且邀  
功輕易生事具實回奏謹題

景泰四年九月二十日

題爲謝 恩事景泰四年九月十八日臣在赤城  
有奏事夜不收劉王留順賚本年八月二十五  
日欽給臣前任兵科都給事中并父母妻室封

贈 勅命一道前來臣謹率官屬郊迎進城拜  
讀訖天恩寵光增賁山谷玉音褒嘉及于一門  
凡在存亡靡不懽悅伏念臣腐儒末學徒守朴  
忠愧無卓異之才能乃有特恩之 勅命恩浮  
望外榮與憂并瞻望

天顏倍深感激謹當益堅初志強勉後功庶竭螻蟻  
之私用答乾坤之造除望闕謝恩外謹奏

景泰四年九月二十一日

題爲撫服殘寇事據走回人王剛稱原跟達賊阿  
者俺等一百餘人爲受也先部下達賊革干帖



木兒使喚不過因此逃出被也先部下達賊趕來殺了四十餘人一向在東北里河邊住在營聽得達賊說稱我每北邊又怕也先差人尋殺南邊又怕南朝軍馬怎得一個人與南朝邊上人說我每只在邊上躲避也先趁水草打圍過活我又不去犯邊等語及宣府入境進貢使臣說被野達子驚散迷路進來及野鷄山墩下達賊帶領黃狗將弓箭解放約遠五十餘步打話墩上人不曉番語等因臣與副總兵孫安議得我國家之與逆賊也先誠萬世必報之讎

朝廷念邊儲未充人力未裕故問罪之師未卽興舉皇上之心卽古先聖王待時而動動在萬全之心也斯世幸甚臣等切照兀良哈等衛達賊在北虜最爲精悍驍勇瓦刺等部下人馬皆所不及

祖宗以來設衛安插寬撫得宜不曾爲患後來逆賊也先潛蓄異謀妄加吞併搶擄追逐不能寧居加之處置乖方或邊將貪功生事殺掠戕害使之進退狼狽計窮力屈不得已脅從也先往年逆賊入寇皆此賊爲前鋒蓋一則藉其勇力一則視爲異類一則使之雪其宿憤逆賊之得以



邊奏有專 卷三 五  
一時僥倖者蓋其善用兀良哈殘賊故也今聞賊中有信受也先約束跟隨往來爲腹心之人者有因受逆賊酷虐偷拐馬匹前來沿邊一帶苟全喘息者十百爲群各帶騎馬家小東西往來趨逐水草打圍過活近來邊墩上瞭見人馬及所謂野達子皆此輩也王剛所說前項情繇以意揣之未必虛詐臣等竊謂此賊殺之既有可矜且不足謂之雪耻復讐不殺則恐在邊日久窺覘稔熟又復被脅歸之也先其爲患害實是不小臣等欲乞 朝廷特降安撫殘寇木榜

### 諭以

祖宗設衛參養之恩與近來撫馭失所之故若能糾衆歸順 朝廷必爲區處安插腹裡地面如其執迷不悟或聽別部指使沿邊往來窺覘侵犯則立調大軍通行勦滅上以宣君父之德意下以離逆賊之腹心且旣得其人可以先知虜情虛實因而取勝亦可參養日久因爲我用從此聲罪致討滅耻除寇臣等愚昧未知可否伏望皇上體天地好生之仁擴王者無外之量特召在廷諸臣詳定可否務使殘寇見之必堅歸順之心



逆賊得之亦無藉口之釁然後降式施行每面  
前寫直書後寫夷字臣等依式刻成木榜選差  
敏捷夜不收乘夜將前項木榜離墩三四十里  
之外有水草去處安放若此賊果有生道來降  
臣等則當另行奏聞處置設若此賊執迷不省  
仍復在邊出沒別爲構結侵犯之謀臣等奏請  
會兵夾道獎率三軍搜捕殘寇使無遺類如此  
庶得問罪有名而受殺之人亦無怨無悔上全  
皇上之德以合天地之仁易曰天地之大德曰生詩  
曰普天之下莫非王土兵法亦曰微哉微哉無  
所不用間也惟

皇上念之而已所據大同宣府等處各邊可用去處  
亦乞裁處緣係邊情重事伏乞裁示施行謹題  
景泰四年十月二十日

題爲進貢事景泰四年十月二十六日夜五更據  
守備馬營周賢等呈備瞭高軍人宋敏報本日  
申時瞭見境外達子五人騎坐騾八匹到墩欲  
要放砲打他說我是林指揮來進馬等因具呈  
行間二十七日未時又據本官呈據差去夜不  
收百戶李長目兒前去探得前項達子稱是也



先差來朶顏衛腰兒不花鬼軍下那林指揮等  
五名馬七匹騾子一頭說稱大沙窩來行走四  
日到邊見在牆外等因本日一更時分又據本  
官呈據瞭高軍人夏良本日辰時分瞭見境外  
達子四人騎牽駝馬到邊稱說我是通事米瓚  
的使臣虎達別的等四人尋駝回還審實隨卽  
驗放入境備呈得此會同副總兵孫安議得前  
項使臣旣稱係進貢例該驗放祇待送京已差  
鎮撫李興前去鎮門墩驗放去後及照先據周  
賢等呈據通事米瓚說稱境外尚有六人尋趕  
驚走駝馬等因今來又只四人前後不一况連  
日進貢使臣前起未行後起隨至及據鎮撫李  
興回還賫執番書一紙呈送前來所據各項夷  
情中間恐有譎謀除行各堡加意隄備并行宣  
府總兵等官知會外具本題 知

景泰四年十月二十八日

題爲撫服殘寇事景泰四年十一月初二日節該  
欽奉

勅得爾盛等奏今兀良哈等衛達子在邊往來恐其  
爲患要出宣諭木榜散在邊上誘其來降等因具



悉今特准所言頒去宣諭一百道至日爾等卽照所奏施行欽此欽遵會同副總兵孫安議得前項宣諭欲便刻榜緣宣府節報朶顏衛達賊見今在邊誠恐遲滯悞事又恐翻刻差訛已經星夜僱造紅油木筒各長二尺三寸內用油紙包裹榜文行令守備官于沿邊地方內議擬可以安放榜文處所并于夜不收內揀選慣熟垂覺敏捷者賚領榜文并木筒前去擇定于本月初八日出境或照依本堡墩臺每墩三座安放一處或量擇達賊經行下營水草處所俱要離境三

四十里眼目看見所在埋立標竿懸掛榜筒去人回日俱要里數地方及記號回報仍差委的當官員曉諭沿邊墩臺守瞭官軍不可因見榜出輒便怠慢務要比常加慎凡遇達子近邊解去弓箭說是來降有馳報定奪行間續准都御史李秉照會會同鎮守總兵內外官員議得宣府迤北境外俱係口外龍門衛迤西地方今有朶顏衛達子在彼出沒要將臣等宣諭木榜內量存十道齎送宣府差人出境安插曉諭等因爲照宣府與口外境界相連事體相同雖臣等



欽奉 勅內不曾開發宣府緣口外俱係擇定  
本月初八日乘夜分投出境安放若候奏請至  
日發去不惟遲滯悞事亦恐難作兩次施行當  
將榜文除發各堡外已行差官賫捧二十道前  
去都御史李秉處交割一體斟酌施行外續據  
口外守備張林等呈據夜不收曹旺等呈依奉  
將領到榜文木筒各于本月初八日晚分投出  
境遵依懸掛停當本月初九日早入境訖具呈  
開報得此案照前事已經通行去後今該前因  
叅照綏懷安輯誠 朝廷之盛德而隄防警飭  
知

尤邊境之遠圖除遵依 勅旨再行各堡沿邊  
腹裏官軍比常加意爲備相幾處分外謹具題  
知  
景泰四年十一月十二日

題爲整飭邊務事景泰四年十一月十二日承准  
兵部照會前事內府抄出守備內官弓勝題總  
兵孫安患病等因奉

聖旨兵部知道欽此欽遵抄出到部叅照所奏雖稱  
前因緣都督同知孫安係干守邊將臣及查無  
彼處協贊軍務右叅政葉盛具奏緣繇卽日又



係虜情變詐之際邊將不可輕易未經勘議難  
便遙制定奪合無鋪馬差人賁文與協贊軍務  
右叅政葉盛從公查勘副總兵都督同知孫安  
是否患有前項疾病堪否醫治守邊應否作何  
處置務在勘議明白星馳具奏定奪既不許輕  
易紛更沮撓邊務亦不許因循苟且致悞邊備  
具奏奉

聖旨是欽此欽遵照會前來臣欽遵勘議得都督孫  
安委于景泰四年十一月初一日與臣在赤城  
東門外館待使臣那林等回還止因怒氣急性

原患中風病症又復舉發至今一十三日雖是  
未出管事臣日至卧內看視所患見其手足漸  
能舉行未是十分沉重今該前因臣惟獨石等  
八城孤懸口外委係緊要邊方將臣所繫誠爲  
不輕今內官弓勝所奏蓋以孫安有病乞與代  
去但臣有不敢不盡者今日 朝廷將官臣踈  
遠不敢妄議若以宣府懷來將官言之分守已  
定決不可動地方隔絕又難兼理此宣府懷來  
將官不可代孫安也若以口外將官言之臣前  
與都御史李秉其舉獨石都指揮張林馬營都



指揮周賢但張林長于綏懷鎮靜周賢長于勇  
敢當先若令協同孫安則可若必令之代替行  
事則張林周賢勞績未著聲望稍輕又非孫安  
之比此口外將官未可代孫安也且孫安歷練  
有年實係舊臣老將幹辦軍事頗爲用心但其  
爲人褊急多疑是以素與弓勝不和亦與張林  
欠合若非調和規正鬪訐已久使其清心省事  
除去褊急多疑濟以寬大坦率善處弓勝勿與  
猜嫌寬待張林勿求其細故則疾病亦可漸去  
下人亦無怨謗較之驟用後生晚輩猶爲遠勝

今須再爲優容令其調理平復目下倘有調發  
出戰等事臣當與之坐運籌策臨期處分口外  
戰將張林周賢之外如黃瑄張壽王榮鄭祥等  
皆可授以成筭領軍取勝古人輿疾以討賊輿  
屍而走敵意亦可見伏望 聖明念極邊重地  
念將材難得乞 勅兵部行令孫安當思 朝  
廷付託之重以古名將自期私怨小忿勿留于  
心躁性暴氣勿見于事上緊用藥調治務在日  
下痊安以理邊事以報 國恩如果孫安所患  
前疾向去有增無減不能臨下管事使臣出境



之日恐失觀瞻臣另行具奏乞代取自上裁謹  
題

景泰四年十一月十三日

奏爲謝 恩事茲者 朝廷以臣等口外地方脩  
復城守 聖恩廣大亦及凡庸欽蒙特賜銀十  
兩紵絲二表裏謹已拜跪祇受訖切惟前項城  
守脩復皆 朝廷威德將士効力所致顧臣何  
功受此上賞下承

天寵中切氷兢敢不益勵微忠永固金湯之域奉宣  
至德同歡衣被之仁謹具奏 聞

景泰四年十一月二十六日

題爲邊務事照得北虜今年進貢使臣于大同陽  
和宣府馬營等處分道而來其躡踏路道窺覘  
軍馬逆謀奸計昭然可見不待智者而後知也  
臣切惟進貢一事中國近年自與瓦剌通好以  
來止是大同宣府兩處大路許其出入蓋兩處  
係是總鎮地方錢糧軍馬蓄積屯聚皆非所屬  
城堡可比及至臨期又調所屬城堡軍馬壯觀  
以振軍威以懾虜心今一旦虜人分道入境如  
宣府地方馬營又係極邊緊關要路今年亦有



虜使從此入境若不與之戒約遵守舊規聽其自行來去竊恐非惟城堡軍馬被其掣制拘碍難以調發及邊方虛實被其偵伺稔熟他日託此爲繇分道入寇重爲邊患且自此以後凡事不循舊規無所忌憚驕蹇縱恣妄自尊大無厭之求非分之欲其爲禍亦豈小哉臣在宣府館待入境使臣那哈赤及卜花奴侍郎時曾問及以爲爾等今歲來朝不依常年事例不循入境故道各邊分道入貢或稱係也先使臣或稱係各衛使臣其皆也先使令主張或是各衛各自主張有那哈赤等答以並不係也先使令主張俱是各衛各自因其所住地方取便入來等語臣惟此言譎詐雖不可信而機會則有可乘臣議得前項事情干係邊務乞 勅兵部將前見

在京使臣諭以常年事例入貢故道使之遵守照舊俱從大同宣府出境仍行口外馬營所收弓箭着落原收官員送至宣府聽候原來使臣回日交割仍乞 聖明于使臣回還之日通行請 勅也先今後務遵舊規戒約部屬凡有進貢使臣各要仍從大同宣府大路入境若仍似



今年聽從各衛部屬擅自主張各因所住地方  
取便分投入境卽係犯邊已令邊將俱不放入  
止知按兵廝殺而已如此庶使虜酋知愧奸計  
莫施而背約違盟其曲在彼唯 聖明留意謹  
題

景泰四年十二月

日

葉文莊公邊奏存藁卷三



